

El «Bündner Kalender 2009» haiel giu la cuida d'astgar scriver e presentar nossas figuras che dattan perdetga dalla lavur da pli baul. Cu la damonda era cheu haiel giu retenientschas e temas! Sai'jeu far quei? A lu aunc sin tudestg! La redactura Sabrina Simmen-Wanner ha dau gronda curascha a mi e suenter cuort temps da ponderaziun haiel dau tier da far quei.

Ed ussa haiel tschaffen da scriver tut sin romontsch e presentar quella lavur ella Tuatschina. Aschia ha ei entschiet en: Igl onn 1985, in onn avon ch'il bab cumpleneschi 80 onns, fagevel jeu patratgs tgei decoraziun da meisa far per quella fiasta. «I sto esser zatgei special». Mia idea: Las differentas lavurs dil pur en figuras miniaturas sco las figuras da Nadal ch'eran da gliez temps in grond «hit». Mo il problem era, tgi che fetschi ils differentes uaffens ed utensils? Cheu sundel ida tier miu um, il Sep, cul problem. El ha mane-giau: O quei vo gie aunc in onn, e sch'el sappi far da quei sappi el buca, mirar ina gada.

Ei fageva atun e nus eran en vacanzas a Dieni. In bellezza di ed jeu mondel per izuns. Vegnend a casa dad esch en, secapescha cun in zeiver plein izuns, sesplenghegiava sin miu taler in cusch e la segir da far ora lenna en miniatura! Saveis s'imaginar, tgei griu che haiel dau dalla legria e surprisa: Gie gest

aschia sto quei esser. Grondius! Aschia ei in uaffen suenter l'auter vegnius fatgs. Per mei ha ei giu num far las figuras leutier, pertgei il Sep aveva gia fatg ina massa uaffens! Aschia ein las suandontas figuras naschidas, sur dallas qualas jeu vegnel a scriver enzatgei.

## Il sitgur

Jeu vesel aunc oz quei bi maletg co il bab segava: Ritsch, ratsch, ritsch, ratsch... vi e neu tunava quei sco ina melodia meditativa. Cun ina ruasseivladad senza sforz, inschign numn'ins quei. El ha mai possediù ina maschina da segar. Per el memia modern e quels



vechichels segan malissim era sia devisa. Sch'jeu cumparegliel ils praus segai dad ozildi ni quels da pli baul, stoiel schar la raschun a miu bab.

### **Batter la faultsch**

Batter la faultsch cun la marcladira e marti ei ina fetg hanada lavur. Cheu drova ei mo ina ni duas gadas pitgar sper igl ur dalla faultsch e lu ei ella sfullada, pia lavagada e buca da saver duvra ella pli. Secapescha che jeu vulevel era empruar da far quella lavur ed il bab mussava cun pazienza. Suenter in per pitgadas ha el manegiau: «Quei co è nuet per buebas, vo tè ad enzarda!»



### **Il pur cun blah e risti**

Rischlar fuva lu era ina caussa per sesez. Paupra ti sch'ei restava sper ina muschna ni in crap in per feins, lu alzava il bab la vusch: «Raschla ple schuber!» Ina gada ha el priu si culs mauns in pugn plein e detg: «Mira, quei è gest ina tshavera per in vadi.» Per mei haiel lu tertgau: O gronda fom astga quei tier buca haver, quel muress dalla fom. Il blah cun cantuns per purtar il fein tessevan las puras, sur da quella lavur vegnel a scriver pli tard tier il tema: «Glin».

*Cuntinuaziun suonda*



## Il pur che resgia e fa ora lenna

Fuva quei enzatgei bi igl avrel, cu la lenna fuva avon casa preparada per resgiar si e far ora lenna. Secapescha che mintga pur mava u cun mugia ni ils pli rehs cun cavagl cun sliusa egl uaul per la lenna. Lu vegneva ei resgiau e fatg ora lenna dis en e dis ora. O quei bien fried da lenna, resgem e rascha! Per nus affons entschevevan las vacanzas da scola. Vacanzas? Na gliez plaid udev'ins buca da gliez temps. Lavur fuva il motto. Gidar a resgiar e far ora lenna. A mi plascheva il far ora lenna meglier che da purtar tala en talina. Mo

ei deva nuot auter ch'era lezza lavur fuva da far. La talina vegneva emplenida da funs tochen tetg cun lenna. La finala stueva quei tonscher per in onn, per cuschnar e scaldar pegna.

## Il pur cun la sliusa ed il blah fein

Da nies temps vegneva ei aunc fatg fein a pastg. Suentar far risdiv mavan ils purs si Caschlè ed en auters loghens e fagevan aunc fein. Igl unviern, lu mavan ils purs per quei fein e transportavan tal en blahs e cun ina sliusa giu el vitg. Ei fuva ina stentusa e malsegira lavur. Jeu seregordel aunc che la mum-





ma era leda e beada cu il bab era a casa  
cun quels buordis.

### **Transportar rauba si d'alp**

Cun ina catla (Räff) transportavan ils  
purs caschiel e pischada giu dal las alps.  
Era uorden e lenna vegneva transportau

d'ina alp a l'otra. Per exempel da Val  
Giuf si Culmatsch. Ed oz? Gie gest oz,  
cu jeu scrivel quellas lingias, transportescha  
il helicopter rauba naven dil par-  
cadi a Dieni sin las differentas alps. Miu  
patratg: «Tgeissà tgei che nos antenats  
schessen da quei?»



### **Il mazler da casa**

Per miu bab ei quei stau la figura la pli  
preferida. El havess bugen empriu da  
mazler, mo quei ha ei buca dau,  
cunquei ch'el era il vegl dils far-  
gliuns. Aschia ha el stuiu far il pur, vu-  
ler ni buca vuler. Quei deva negina  
discussiu da gliez temps. Aschia ha el  
fatg onns ora mazler da casa. Gl'unviern  
mava el tier ils purs a maz-  
zar pors e tiers manedels. Cheu fuva el  
en siu element. Per 4.- frs. a di luvrava  
el naven dallas 08.00 la damaun ento-  
chen las 17.00 suentermiezdi.



Cheu seregordel jeu dil suandont: Jeu havevel 13 onns. La mumma fetg malsauna ed jeu hai survegniu liber da scola quei di da «mezga». Tgei plascher che jeu havevel, inaga da saver gidar naven dalla damaun entochen la sera. La mumma era buca propi cuntenta da quei, che jeu vesi co ins sieti e canni il «tschichel». Gest quei era per mei igl interessant. Cun tgei quiet che jeu marschavel vin nuegl quella damaun saveis

cumprender. Enta maun la cazzetta d'iom ed ina palutta. Lu il bab cun il «flobert» in tac, il piertg giun plaun cun il cunti da cannar el culic». Jeu havess giu da turschar il saung, mo a mi era tut stgir avon ils eglis e per cletg era nossa buna vischina, la Stasia, sin finiastra ed ha viu il problem ed ei immediat siglida en agid. Cu igl ei stau da sbugliantar il piertg, vulevel jeu era gidar, mo manegieis che jeu havessi dumignau naven in pelegn...na gnanc raschieni. Il bab ha lu manegiau che jeu nezegi pli bia en casa che vid tala lavur.

*Cuntinuaziun suonda.*

Las figuras ein exponidas el museum La Truaisch a Sedrun. Il museum ei puspei aviarts naven dils 1 da fenadur entochen ils 31 d'october 2010 mintgamai mardis, venderdis e mintga emprema dumengia dil meins allas 15.00 uras entochen las 18.00 uras.